



UNIVERSITÄTS-
BIBLIOTHEK
PADERBORN

Universitätsbibliothek Paderborn

Widder die kelch Diebe

Bugenhagen, Johannes

Wittemberg, 1532

VD16 B 9473

Emahus.

urn:nbn:de:hbz:466:1-34042

gebot wol darnieder legen/ *Ex plenitudine potestatis/ si
subest rationalis causa/* Sie haben zu der hurerey red-
liche vrsachen/ denn sie haben den Göttlichen Bestand
verschworen. Das sie aber ire hurerey für sünde beichten/
das thun sie nicht vmb Gottes gebots willen/ sondern
darumb/ das der Babst die selbige auch im schein verbo-
ten hat/ Wenn das der Babst wolte anders schreiben/
als das hurerey nicht sünde were/ so musste Gottes gebot
wol zu rucke treten/ wie im dieser sachen/ Das Christus
seinen Christen den Kelch gegeben hat/ solchs kan der
Pfaffen Kirche wol verbieten vnd wandeln/ Aber dassel-
bige jr vnchristlich gebot kan niemands brechen/ er sey
denn ein solcher Kerzer/ der da sterben musse. Zeisset das
nicht den menschen vber Gott gesetzt? Welcher Wid-
derchrist künde doch vn sinniger vnd Gottloser ding
erdencken vnd treiben/ widder Christum vnd sein Euan-
gelion?

Emahus.

Wenn nu vnsern Pfaffen alle irer freuel vnd gewalt
genommen wird mit Gottes wort/ so faren sie zu/ vnd wöl-
len beweisen/ das ehe Christus zu himel fur/ die Leyen
einerley gestalt des Sacraments genommen haben/ Des
gleichen auch darnach im anfang der Christlichen Kir-
chen/ vnd sagen/ Christus nach seiner aufferstehung/ wie
Lucas schreibet/ gab zu Emahus den beiden Jüngern
das brod / vnd nicht den Kelch/ denn sie waren Leyen/
daraus wol abzunemen ist/ das die Leyen alda den Kelch
nicht haben getruncken.

Antwort/ Wer hats euch gesagt/ das das brod zu
Emahus Christus leib war/ oder das halbe Sacrament?
Christus spricht ja nicht alda / *Veniet / esset/* Das ist
mein leib/ Wie seid jr denn so vermessen/ das jr on Got-
tes wort

tes wort sagen dürfft aus eim mitwillen/ was jr wöllet/
vnd wollet damit Christus offentlichen befehl vom Sa-
crament umbstossen? Die Pfaffen wolten gerne alhie
etliche Doctores auffbringen/ die mit in stimpften/ vnd
soltten zu Emahus ein Sacrament machē/ Aber die Do-
ctores gebrauchten alhie offemals Allegorien vnd Allusi-
ones ad textum scripture/ vnd wölten doch damit der
rechten Historien nicht abbrechen/ auch keinem worte
Gottes/ welchs alleine die Pfaffen suchen/ Auch sol inn
der Christenheit nicht der Doctoren/ sondern Christus
wort gelten/ dem sollen die Doctores glauben/ vnd dassel-
bige vnd nichts anders/ sollen sie leren/ On Gottes wort
sehen wir niemands an in solchen sachen. Das ist gewis/
wenn einer zu den gezeiten der Doctoren hette den Leyen
den Kelch wollen verbieten/ die Doctores hetten in für
einen Ketzer gescholten/ darumb dürffen sich die Pfaffen
der Doctores nicht rhümen noch trösten.

Vom Sacrament ist ia kein ander befehl geschehen
von Christo/ denn im letzten Abentmal/ Hat er alda den
Leyen den Kelch nicht befohlen/ so hat er in auch sein
brod nicht befolē. Den eben den jüngern/ den er im abent-
mal sein brod befihlt/ das sie solchs darnach thun sollen/
bis an das ende der welt/ wie Paulus saget/ den selbigen
befihlet er alda auch den Kelch/ vnd widerumb denen er
den Kelch befihlt/ den befihlt er auch das brod/ vñ keinen
andern/ Also haben es die Aposteln verstanden/ vnd fort
an die Christen geleret/ vñ die Christen habē es auch also
gehalten/ wie Paulus vnd die Doctores Ecclesie bezeugen.
Wie kömpt jr denn dazu/ das jr mit dem brodte zu
Emahus/ wöllet verkeren/ verbieten vnd verfolgen/ was
Christus von seinem leibe vnd blut im Sacrament be-
fohlen hat/ vnd die Aposteln geleret/ vnd die Christen
gehalten?

L ij Sages

Saget doch Lucas nichts anders/denn das die zween
Jünger den H^{errn} erkant haben inn fractione panis/
im brod brechen/Er schreibet ia nicht/das der H^{err} ge-
sagt habe/Das ist mein leib/Er schreibet auch nicht/das
sie gegessen haben/sondern alleine/das ire augen auffge-
shan sind/vnd sie in erkant haben/im brod brechen/vnd
das Ihesus balde verschwand/von iren augen/vnd das
sie auffstunden/vnd giengen wider nach Jerusalem etc.
Wo liessen sie denn das Sacrament/als jr saget? Ich
meine/sie haben es inn eine Monstrantz gesetzt/vnd ha-
ben eine Walfart angericht/zum heiligen Leichnamgen
Emahus. Hilff du heiliges Sacrament zu Emahus/
das ia die Leyen den Kelch des H^{errn} nicht widerumb
bekomen/Wo wolten wir sonst mit vnsern Segfeursme-
ssen bleiben?

Digressio. Die zu Emahus habē ia keine schuld dran/Aber lie-
ber leser/halt mir alhie zu gute/das ich ein wenig auspa-
cire/so lange/ bis ich füglich widder ad Propositum ko-
me/Ich wil ein wenig von Emahus gehen/darnach wil
ich widder komen/zu vnsern Pfaffen/die zu Emahus
sind.

*Monstranti-
en.* Die büberey der Monstrantien hat man erst erdacht
inn diesen letzten hundert jaren/ also das man auch noch
darüber (das greulich ist) an etlichen örtern das blut
auff der Hostien weiset/welchs doch die Pfaffen so heim-
lich auspuzen vnd anrichten/zu verfürung der armen leu-
ten/alleine das sie etwas dauon erlangen/inn iren Judas
beutel.

Sternberg. Zu Sternberg weis man wol dauon/O wie lieffen
die Teuffel dahin inn den besessenen leuten/das sie ia das
grosse Abblas möchten Confirmiren/mehr den der Babst
selbs.

Alhie zu Lübeck hatten sie auch einen solchen Pfaf-
fen Gott

fen Gott inn des heiligen Geistes Kirche/Dahin schick-
ten sie in nöten frauen vnd jungfrauen/wullen vnd bar-
fus/mit grossen Opffer/ Dahin gelobten sich/die leute/
suchten hülffe vnd trost. Tu aberaus Gottes gnaden das
Euangelion alhie an den tag kam/da ward der Pfaffen
Gott weg gethan/vnd kam die büberey offentlich für die
leute/denn es ward befunden/das es eine Hostia war/
(wie man es nennet) von den miten zu fressen/vnd von
einer Muschaten blumen drauff geklebet/das solte das
blut Christi sein. Solch blut weisen die Kelchdiebe den
Leien/wenn sie in den Kelch Christi abgestolen haben.
O HERR Gott/wie können doch der Judas hertzen
also vergifft sein?

Solche büberey der Pfaffen/vnd andere vnzeliche Sacraments-
misbreuche des Sacraments/als mit den Sacraments-^{schender.}
henslin/oder Ciborien/mit Monstrantien/mit den Seg-
fenersmessen etc. fassen nu die Sacramentschender auff
der Cantzeln etc. gleich widder vns/die wir doch recht
leren vom Sacrament/nach Christus befehl/vnd sagen/
das wir keinen Gott haben/odder keinen Christum/on
das Sacrament/das Sacrament sey vnser Gott vnd vn-
ser Christus. Vnd wenn wir das Sacrament nicht sehen/
so wissen wir nicht/wo vnser Gott ist/wir wissen Gott
nirgend sonst zu suchen/denn im Sacrament/wir wissen
Christum nicht zu suchen zu der rechten hand Gottes/inn
der herrlichkeit seines Vaters. Mit solcher vnverschemp-
ter lügen machen sie schawe das vnuerstendige volck/
(das sonst gerne vom Sacrament bleibet) das es vnser
rechte lere vom Sacrament nicht kan annemen.

Wie denn nu zu Weinachten/Er Neuer zu Wismar-
that/der da sein volck leret/widder das Sacrament/ja
auch widder die gnade des glaubens/der menschwer-
dung Christi/aus dem sechsten Capitel Johannis. Caro
non

non prodest quicquam/ vnd log alda vber den heiligen
Johannem/ gleich als solt er geschrieben haben/ das der
leib Christi im Sacrament nicht kan seliglich von den
Christen gegessen werden/ wenn der leib schon alda we-
re/ welchs er doch nicht gleubet/ vnangesehen/ das Chri-
stus also sagt/ vnd zu gleuben befihlet.

Aber ich sage/ das in Christo/ vnd weis/ das ich ni-
cht liege. Neuer weiset die leute auff das sechste Capitel
Johannis/ als wider das Sacrament/ Ich habe inn sei-
nem zusammen gesickten büchlin wol gesehen/ wie vnge-
lert er sey in geistlichen sachen/ vnd wie er on fürchte Chri-
stus befehl inn den wind schlagen kan/ Aber hat er inn
seiner versamlunge leute/ die das 6. Cap. Joh. recht verste-
hen/ die nicht alleine mit dem munde/ sondern mit dem
herzen vnd glauben wissen/ was das geistliche essen vnd
trincken sey/ des fleisches vnd bluts Christi/ des lebendi-
gen brods/ welches tag vnd nacht geschicht bey den gläu-
bigen/ dauon denn Johannes/ vnd nicht vom Sacra-
mente saget/ welches Christus nachmals im Abendmal
ausgesetzt vnd befohlen hat. Solche leute/ sage ich/ wie
sie da sind/ die werden gewis nicht lange vom Sacra-
ment bleiben/ das in Christus befohlen hat/ vnangesehen
des Neuers verfürische lere/ Sonst sol man geistliche
brodsfresser finden/ die von geistlichem essen vnd trinckē
des leibes vnd des bluts des menschē Sons/ das ist/ vom
glauben an Christum/ nichts mehr werden wissen/ denn
die wort alleine/ vnd darnach auch/ gleich wie Neuer/
das Sacrament können verachten.

Ich habe gehört/ das in die Fürsten verboten ha-
ben seine Schwermerey zu predigen/ darumb schweiget
er stille vnd gibe vrlaub dem Sacrament/ gleich als het-
te vns ein kesselflicker das Sacrament befohlen/ der ni-
chts zu achten were/ Wenn seine Schwermerey Gottes
wort

wort were/ vnd erkente das Sacrament/ auch nach sei-
nes Kopffes meinung/ von Christo befohlen/ so schwiege
er nicht/ vnd ließe nicht das Sacrament verachten/ vmb
der Fürsten willen. Aber ein solcher Schwermergeist ke-
ret sich nach dem winde/ vnd richtet zum letzten auch lei-
des verderbnis an/ denn Gott ist noch Richter im lande/
Das wort Gottes aber mus ewig bestehen vnd blei-
ben.

Solche Schwermerey hat so viel angericht/ das man
zu Wismar inn zweyen Kirchen widerumb angenommen
hat/ den grösssten greuel der Segeworsmessen/ nach er-
kandter warheit/ des befehls Christi vom Sacramente/
Das ist der fruchte eine/ die von den Sacramentschen-
dern kömpt. Hat Meier nicht dazu geholffen/ so hat er ja
mit seiner predigt nicht geweret/ so viel als einem Euan-
gelischen prediger zu stehen/ Ich fürchte noch eines ergern
hernach. Wir sind schuldig/ vleissig für sie zu bitten/ wi-
der die Schwermer/ als für vnser lieben brüder/ sonst ha-
ben wir kein gehöre bey den leuten/ denn jr viel schelten
vñ lestern vns/ drum das wir nicht mit in Sacrament-
schender wöllen sein/ wider den befehl vnd wort vnser
I E R R I Ihesu Christi/ Gott mache es besser mit
jn.

Vnser glaub ist nicht/ wie vns Meier vnd seine Kotte
schendet/ Wir glauben/ das vnser Herr Ihesus Christus
mit krafft den todt iberwunden hat/ nach der schande
des Creuzes/ sizet nu zur rechten hand des Vaters/ im
himmel iber alle Fürstenthum/ gewalt/ macht/ herschafft
vñ alles was genennet mag werdē/ nicht alleine in dieser
welt/ sondern auch in der zukünfftigen/ Er hat gekriegt
einen namen iber alle namen (nicht einen winckelname/
wie jm die Sacramentschender geben) vnd der Vater
hat alle ding vnter seine füsse geworffen / vnd hat in
D (Christum

Christum Gott vnd mensch vngescheidet) gesetzt zum
heupt der Christenheit/ vber alle ding/ welche Christen-
heit ist sein leib vnd die fülle/ des der alle ding inn alle
len erfüllet/ Ephe. 1. Mit welchem Christo wir Christen
nicht alleine ein geist sind/ sondern auch ein fleisch/ die
weil wir durch den glauben eingeleibet werden/ nicht alle-
leine seiner Gottheit/ sondern im/ das ist/ Christo/ Gott
vnd mensche/ gleich wie essen vnd trincken in vnser fleisch
verwandelt wird/ darumb er auch nicht alleine ewiger/
natürlicher Gott vnd Gottes Son bleibe/ sondern ward
auch zu seiner zeit natürlicher mensch von dem heiligen
geiste/ vnd der Jungfrauen Marien/ Also wird dich le-
ren das 6. Cap. Joh. vnd Ephe. 5. stehet öffentlich also/
Wir sind gliedmas seines leibes von seinem fleische vnd
von seinem gebeine 2c. Lies fortan.

Die Sacramentschender sind bekümmert/ wie sie im
himmel in einen winckel setzen mügen den leib Christi/ das
er vns ja nicht hindern sol im Sacrament/ vnangesehen/
das er vns solchs zusaget/ Aber der gecreuzigte Christus
ist vnser heupt. Wie ferne ist denn das heupt vnd der leib
von einander? Er ist vnser breutgam/ fleisch vnd bein/
Man vnd weib ist ia ein leib. Christus ist bey vns/ bis an
das ende der welt/ Matt. vlt. Vnd wo jr zween oder drey
inn meinem namen versamlet sind/ da ist er vnter jn/
Matth. 18.

Ja sagen sie/ Christus ist bey vns im geiste. Wir ant-
worten/ Ja gewis ist Christus bey vns im geiste/ Selig
ist aber/ der es verstehet / vnd lesset sich nicht alleine
mit dem worte Geist/ geist/ geist/ betrogen. Im geist ist er
bey vns vnd inn vns/ vnd bleibet inn vns/ vnd wir in im/
denn wir glauben an in/ das ist/ an den Son Gottes/ fur
vns ein Son des menschen/ fleisch vnd blut geworden/
So leret er Johan. 6. Aber die alda lesen/ Caro Christi
non

non prodest quicquam/die verstehen es nicht/ sondern sie
sind geister/nicht von Gotte/sondern ein geist des Wid-
derchrissts/davon Johannes saget 1. Joh. 4. Denn sagen/
das Christus nicht sey ins fleisch Komen/ vnd sagen/das
sein fleisch nicht nütze sey/ist ein ding. Zwinglius spricht
offentlich/Caro mea vere est cibus/Caro mea/ id est/ Di-
vinitas mea. Sihestu/was der geist sucht? Des mensche
Son wil er vns vnnütze machen/ darauff vns denn wei-
set das ganze Capitel Johannis/Sie gehen mit fleisch-
lichen gedancken vmb/vnd sind fleischlich on geist/ das
ist/ leute on glauben/davon Christus saget/Das fleisch
ist nicht nütze/ die wort/ die ich rede/die sind geist/vnd
sind das leben/Aber etliche vnter euch die glauben nicht/
denn(spricht Joh.) Ihesus wuste wol von anbeginne/
welche nicht glauben würden/ Vnd Perrus spricht auch
daselbst/ Herr/ wo sollen wir hin gehen? Du hast wort
des ewigen lebens/ vnd wir haben geglaubt/vnd erkant/
das du bist Christus der Son des lebendigen Gottes. Da
höret man den geist/der lebendig macht/ da ist das geist-
liche essen.vnd trincken des fleisches vnd bluts des men-
schen Sones.

Der sich auff solchen geist nicht verstehet/der lasse
die leute zu frieden mit dem worte/Geist. Solch essen vñ
trincken geschicht bey den Christen on vnterlas/ die weil
sie nicht auff hören zu glauben an Gottes Son/ für vns
des menschen Son worden/ vnd für vns am Creuze ge-
opffert. Zwinglius saget/ Caro Christi prodest ce/ia/ sed
non prodest esa. Blind/blind/Toll/toll/ Sage doch Chri-
stus an dem selbigen ort/on vnterlas/ so man sein fleisch
nicht isset/ vnd sein blut nicht trincket/so kan man kein
leben haben etc. Das heisset ja essen/es sey auch/ was es
für ein essen sey/ noch heisset es ia essen Christus fleisch/
Sol es denn nicht nütze sein zu essen/ warumb dreyet
V ij denn

denn Christus so gewlich/ so man es nicht isset? Dar-
umb ist es ia erlogen/ wenn man saget/ non esa/ Denn
Christus ist ein mal fur vns am Creuze geopffert/ wil
aber on vnterlas von vns gegessen werden im glauben
etc.

Wenn du nu sprichst/ Christus ist bey vns im Geiste/
so sage ich/ Ja/ Aber was ist das fur ein Christus/ der
bey vns ist im geiste? Ist er alleine Gott? Nein/ Er ist
Gott vnd mensch/ er sey wo er sey/ mit welcher weise er
auch da sey/ Gott vnd mensch können sich inn dem Chri-
sto nimmer von einander scheiden/ Denn das wort ist ni-
cht alleine im fleische/ sondern wie Johannes saget/ Das
wort ist worden fleisch. Hüte dich fur dem geiste/ qui sol-
uit Christum/ wie nach dem alten Latein stehet inn der
Epistle'n Johannis.

Das aber die tolle vernunfft hie zu feret vnd lefert/
Wie kan ein menschlicher leib also gerechet werden vber
himmel vnd erde/ das er sey/ da Gott ist? Das gibt dem
Christlichen glauben nichts zu schaffen/ Er helt sich an
Gottes wort/ vnangesehen/ die sinnen vnd vernunfft. Vñ
Christus hat nach seinem leiden nicht einen menschl-
chen namen bekommen/ welchen die vernunfft auspeculi-
ren kan/ sondern einen namen vber alle namen/ vnd sol
nu erkant vnd bekant werden/ inn der herrlichkeit seines
vaters. Dwo nature sind im wesen Christi/ aber die beide
naturen sind also inn einer person Christi/ das sie nimmer
mehr von einander können gescheiden werden/ Wo du
den Gott inn Christo findest/ da findestu auch den men-
schen inn Christo/ wie Christus auch zu Philippo sagte/
Johan. 14. Wenn es alhie zeit vnd stelle hette/ so soltestu
wunder hören/ wie das die Schrift redet wider alle ver-
nunfft.

Lieber Er Neuer/ solch einen Gott haben wir inn
solchs

solche bekentnis soltu vns kein loch boren. Einen solchen mechtigen Christum/ wie wol er gecreuziget ist/ haben wir/ der hat macht gekriegt inn himel vnd auff erden/ Matth. vlti. Vnd ist gesetzt zum herscher vber alle Creaturen Gottes/ nach der schande des todes/ als im achten Psalm stehet/ vnd Hebre. 2. etc. Er muste alhie leiden/ vnd also eingehen inn die herrlichkeit seines Vaters.

Die herrlichkeit des Vaters ist nicht inn einem winkel des himels/ darumb ist auch nicht die herrlichkeit des gecreuzigsten Christi inn einem winkel des himels/ sondern er sitzt vnd regieret zur rechtē hand Gottes/ als Got vnd Gottes Krafft selbs inn der herrlichkeit seines Vaters mit macht im himel vnd auff erden/ vnd erfüllet alles in allen. Der ist vnser Gott/ Gott vnd mensche/ Inn im ist der Vater/ vnd der heilig geist/ Auffer dem Christo/ welcher Gott vnd mensch ist/ ist kein ander Gott/ weder im himel noch auff erden/ An den gleubē wir/ den suchen wir/ mit dem vnd inn dem wollen wir leben ewiglich/ Durch in haben wir einen gnedigen Vater/ vnd sind des bösen geists los/ begabet mit dem heiligen geiste/ Kinder Gottes/ ewig selig/ Darumb darff nicht ein Gottlos lestermund liegen/ vnd sagen/ das wir keinen andern Gott haben/ denn das Sacrament.

Solch ein mechtiger Gott vnser lieber HERR Ihesus Christus/ Gott vnd mensch/ hat vns seinen Christen inn seinem letzten Abendmal zu Jerasalem/ in der nacht/ da er verrhaten ward/ befohlen seinen leib zu essen/ vnd sein blut zu trincken im Sacrament/ so offft wir darumb zusammen komen/ zu seinem gedechtnis/ bis an den jüngsten tag/ nach der massen vnd weise/ vñ mit solchem glauben/ wie seine klare vnd seine ungezweifelte wort lauten/ nach dem solchs Paulus vnd die drey Euangelisten beschreiben/ Matth. 26. Mar. 14. Luce. 22. 1. Corin. 10. vnd. 11.

V ij Vnd

Vnd hat vns nicht zuvor langst befohlen sein Sacra-
ment des brods vnd des weines/ wedder zu Capernaum
im Galileischen lande/ noch anderswo/ das man nicht
dürffte das 6. Cap. Johan. hieher bringen/ widder das
Sacrament Christi/ vns zu Jerusalem befohlen/ da
Christus verrhaten ward.

Du hast gehört/ was wir für einen Gott vnd Chris-
tum im glauben haben/ nach dem heiligen Euangelio/
Daruber hetten nicht bedürfft die Sacramentschender
mit vns zu haddern/ wenn sie nicht so gifftrig vnd schalck-
hasstig weren/ das sie solchs nicht wissen wollen/ von
vns vñ vnser lere/ Es ist büberey mit in/ wenn auch schon
vnter in etliche from vnd gelert scheinen/ Mit solchen le-
rern sind wir inn der Papisterey auch verführet. Es ist
in genug gesagt/ In ist auch genug geschrieben/ Sie wöl-
len aber inn irer büberey gerne bleiben/ vnd das arme
volck inn der blindheit behalten/ Gott helffe den iren-
den/ vnd straffe die mutwilligen verführer Amen.

Ich hoffe ire lesterung wil ein ende nemen/ den die
alhie im lande sind/ beginnen zu sagen/ Wenn Christus
gesagt hette/ das/ wenn man die wort spricht/ Das ist
mein leib/ so sol das brod gewandelt werden inn meinen
leib/ so wolten wir warlich die wort nicht ausschlagen.
Mit solchen Worten bekennen sie ire blindheit/ vnd mei-
nen/ das wir in der Pfaffen Consecration vnd Transsub-
stanciation stückē/ wolten gerne Christus meister werdē/
wissen noch nicht/ was Christus befohlen hat/ oder was
wir aus Christus befehl vom Sacrament leren/ wie ich
dauon auch geschrieben habe inn der Lateinischen Con-
fession/ Das machts/ denn sie werffen die nasen auff/ vñ
verachten vns mit Christus befehl.

Ich höre iren fal/ Es weis aber Gott/ das ich darü-
ber keine freude habe/ Ich wolt lieber/ es hette eine an-
dere

dere gestalt mit in/wenn es Gottes wil were etc. Zwings-
lius vnd Oecolampadius werden ia die sache nicht mehr
treiben/Gott gebe/das sich die andern besser bedencen/
Aber von Martino Bucero höre ich viel guts zu der ehre
Gottes/widder die lesterung des Sacraments/ also das
er sich auch an etlichen örten inn fahre des leibes ge-
geben hat vmb der warheit Christi. Ists war/ (wie mir
denn glaubwürdig geschrieben ist) so wird er zu schaffen
kriegen/ so helffe denn auch vnserm lieben bruder/vnser
Herr Ihesus Christus. Ists anders/so richets Gott.

So ist nu der hadder nicht darumb/ was wir für ei-
nen Got haben/Sondern ich frage/ ob auch ein Christen
mensch/der mit ernst/vnd nicht mit dem schein ein Chri-
sten ist/Komme verachten vnd inn den wind schlagen vn-
sers Herrn Jesu Christi Göttlichen vnd ernstest befehl
vom Sacrament/gleich als obs in ein kesselflicker odder
ein loser mensch befohlen hette/ wie Herr Meuer that zu
Wisnar.Darauff antworte mir/da ist der hader.

Meuer nimpt auff sich eine grosse sache wider Chri-
stum/vnd wil doch keine mühe vnd erbeit damit haben/
Er ist ia ein mensch/der gute/sanffte/faule tage liebet/
denn alleine auff Weynachten (die weil er denn nicht
anders zu predigen hat) lieset er seinem volck für das 6.
Cap. Joh.vnd leret sie draus/ das das fleisch Christi ni-
cht nütze sey/Wenn er das 6.Cap. Johan.recht verstünd/
vnd lerets auch recht seinem volck/ so wurden sie nicht
lange bleiben in irem irthum. Schwermen ist kein kunst/
aber glauben ist Gottes werck.

Er wil auch keine mühe damit haben/wenn frome/
gelehrte leute zu im komen/vnd wollen seinen irthum stra-
ffen/vnd in vnterrichten/sondern spricht/ Ich glaube al-
so/ Wenn er denn mit seinem geiste nicht glauben kan
Christus worten/vnd kan so leichtlich Christus befehl
vom

vom Sacrament verachten/ welchs kein glaubiger mens-
sche thun kan/ so solte er doch die andern nicht verführen/
Solche müssen frome leute heissen/ widder vns/ aber sie
beweisens leider nicht wol/ Ich wolte in allen ire namen
gerne gönnen/ wenn sie nicht Christum so schendlich ver-
achteten/ inn seinem befehl/ vnd vnchristlich verlencketē.

Das ich mich von Gottes gnaden rhüme/ Ich habe
alhie zu Lübeck viermal in diesem iare den Catechismum
gepredigt/ meine andere erbeiten vnd predigten sind auch
auch wol bekand/ welchs auch die andern Predicanten/
derer wol zwentzig ist/ treulich thun/ mit grosser arbeit/
vñ vnterrichten das junge volck vnd die vnuerstendigen/
offentlich oder heimlich/ fordern das volck zu sich/ wenn
es ein iglicher begeret/ sonderlich aber geschichts/ wenn
man zum Sacrament gehen wil/ leren vnd trösten mit
Gottes wort etc. wie Paulus Timotheum vermanet/ zu
erretten die irrigen/ zu straffen die mutwilligen/ zu trösten
die betrübten/ mit dem troste/ damit vns Gott getröstet
hat.

Da widder sparet Kleuer solcher mühe vnd nöthlicher
arbeit/ wirfft die nase auff vnd spricht/ Sie suchen den
Beichtpfennig/ Er ist mit vrlaub nicht war/ Ich weis
nicht/ wasse freude der Beichtpfennig bringet/ denn ich
bin kein Mönch odder Beichtuater gewesen/ bin sonst
von Gottes gnaden ein verlauffener Pfaffe/ vnd wor-
den ein Christlicher Priester. Wenn vnser HERR Gott
nicht mehr von einem prediger forderte/ so soles Kleuer
vnd ein iglicher dafür halten/ ich wolte auch nicht sorgen
für gute Kinder schulen/ für gelerte vnd frome Predican-
ten/ für die Francken leute/ für die nottürfft der armen/
ich wolte mich alleine beweisen damit/ das ich die zeiger-
stunde umbkerte auff dem predigstuel/ vnd lerete was ich
wolte/ vnd wenn michs nicht gelüftet die heilige schrift
zu predigen

zu predigen/ so wolte ich meine grosse Kunst beweisen/
mit nerrischen Allegorien/ vnd sagen/ das die 28 Capitel
Matth. sind im tabernakel Mosi bedentet/ vnd der glei-
che/ Darnach wolt ich mich verschliessen/ als ein Munch
in der Cellen/ vnd niemands dienen/ denn dem ich gerne
wolt/ vnd wolte ander leuten Christliche vnd nötige ar-
beit noch dazu verachten vnd verechtlich machen/ vnd
wolt die Stad lassen full werden/ mit Pfaffen/ die mit
Segfeursmessen vmbgiengen/ vnd dazu voller Sacramen-
tirer/ die ich nicht straffen wolt/ vnd auch nicht dawider
lernen. Welch ein fein sanfft leben wolt ich haben/ vnd
wolt sein ein feiner fridsamer Euangelischer prediger/
Aber wo wolt es zum letzten hinaus.

Der nu hören kan vnd wil hören/ dem wil ich einen
prüffstein vnd eine gewisse Kunst geben/ das er der Pfa-
ffen vnd Sacramentirer büberey wider das Sacrament
on allen feil öffentlich mercken sol. Die Pfaffen misge-
brauchen des Sacraments/ die Sacramentirer verleugnē
es/ aber sie haben beide zu gleich eine seuche. Wenn du hö-
rest/ das sie die Wunderburg lauffen/ vnd suchen hin vnd
her/ aus dem alten vn newen Testament/ vñ in menschen
schrifften/ damit sie ire lere mügen vnterstützen vñ zusa-
men flicken/ vnd wollen nicht an den befehl Christi vom
Sacrament/ inn den dreien Euangelisten vnd inn Paulo
beschrieben/ odder so sie ja die schande hinan dringet/ so
martern sie sich mit faulen glossen/ mit abnemen odder
langen zusetzen/ die fur dem hellen vñ klarem wort nicht
furuber können. Geschichts also/ so sage frey/ Es ist eine
schalckheit vnd büberey/ Daran sundigestu nicht/ sondern
gibst Gott seine ehre/ wider solche büberey des teuffels/
Wiltu solche Kunst nicht wissen noch lernen/ so las dich
flugs verfären/ ich wil entschuldiget sein. Christus wort
sol den Christen mehr gelten/ denn himel vnd erde/ vnd
X alle

alle vernunft vñ alle weisheit der Engeln vnd der menschen / sol weichen Christus befehl / vnd geben seinem worte die ehre / Amen.

Widder hin gen Emahus.

Lieber Christlicher Leser / ich bit dich freundlich / halte mir zu gute / das ich so ferne bin ausspaciret / extra propositum. Mein hertzleid / das ich trage widder der Pfaffen misbrauch / vnd lesterung der Sacramentirer / hat solchs von mir gefordert / vñ mich dazu verursacht. Wilstu weiter vñ mehr bescheids von mir wissen / so lies mein buch aus den dreien ordnungen genennet / vnd sonderlich meine Lateinische Confessio de Sacramento etc. darinn ich auch auslege das 6. Capitel. Joh. Ich wil aus Gottes gnaden für solche schrift antworten / wo ich sol / vnd kan auch leiden / das die widder mich schreiben / die böse sind / doch mit schriften / Weiber teiding vnd scheltē achte ich nicht. Ich wil nu widderumb gen Emahus reisen / da ist Christus verschwundē / vñ die beiden jünger sind von der Collation entlauffen. Drumb sind die Pfaffen gerne alda ich hoffe / ich wil sie noch alda finden. Die armen jünger sind von Jerusalem gen Emahus gereiset / vnd haben nicht getruncken / müssen auch widder ungetruncken nach Jerusalem lauffen / denn sie sind Leyen vnd nicht Priester / als die Pfaffen sagen. Zetten sie alda getruncken / so wolten die Pfaffen vnsern Leien den kelch gerne gönnen.

Bevns gilts des kelchs halben eben so viel / man sey priester odder Leye / Aber ifts war / das sie seibs leren von den beiden jüngern / so sind warlich priester gewesen / Denn jr eigener Doctor Nicolaus Liranus schreibet vber das Euangelion Luce / das diese zween jünger sind gewesen von den siebenzig jüngern / von welchen der eine Cleophas hies / wie es der Text mit sich bringet / Der ander sol Lucas gewest sein / als man saget / darumb habe er
auch